

inferere possunt, ut postea docebo) non contra  
 ibo. Haud me latet vetustioribus seculis gentes  
 originem suam ad Herculem, posterioribus ad  
 Trojanos retulisse. Detur hæc venia Antiqui-  
 tati ut miscendo vera falsis, humana divinis  
 primordia gentium & urbium splendidiora &  
 augustiora faciat, cum ut habet Plinius, vel men-  
 tiri clarorum imagines sit aliquis virtutum amor.  
 Ego cum Varrone Romanorum doctissimo hujusmodi à  
 Diis repetitas origines utiles esse lubens agnosco, ut viri  
 fortes, etiamsi falsum sit, se ex Diis genitos esse credant,  
 ut eo modo animus humanus veluti divina stirpis fiduciam  
 gerens res magnas aggrediendas presumat audacius, agat  
 vehementius, & ob hæc impleat ipsa securitate felicius.  
 Ex quibus tamen verbis colligit B. Augustinus  
 doctissimum illum Varronem hæc falsa esse quam-  
 vis nec audenter, nec fidenter, pene tamen con-  
 fiteri.

Quandoquidem igitur de nominis Britanniae  
 notione & primis incolis non sit una eademque  
 omnium sententia, & male metuo haud quif-  
 quam veritatem tot seculorum anfractibus tam  
 profunde demersam eruat: ignoscat etiam mihi  
 inter alios candida lectoris humanitas, si ego  
 modeste sine cujuspiam præjudicio conjecturam  
 etiam interponam meam, non altercandi ani-  
 mo (procul ab sit) sed veritatis indagandæ stu-  
 dio, quod me totum occupavit; eoque perduxit,  
 ut malim hac in re culpam (si qua sit) deprecari,  
 quam omnino culpa vacare. Ut tamen facilius  
 & facilius nominis ratio, si fieri possit, elucescat,  
 primum qui fuerint primi insulae incolæ quoad  
 potero investigare conabor. Quamquam illi in  
 ultimo Antiquitatis recessu, tanquam in sylva  
 plusquam densissima, ubi nullæ semitæ, ita deli-  
 tescent, ut spes sit nulla vel perquam exigua, no-  
 stram sedulitatem posse retrahere, quæ à majo-  
 ribus tanto tempore subduxit oblivio.

Ut vero altius rem repetamus, & Cæsarem  
 cum Diodoro & aliis omittamus, qui Britan-  
 nos *Αυτοχθόνες*, & Aborigines, id est, non aliunde  
 advectos fuisse voluerunt, hominesque blittarum,  
 & fungorum instar è terra in principio germinasse  
 suspicati sunt; Ex sacra Mosis historia  
 docemur, à diluvio tres Noe filios, Sem, Cham,  
 & Iaphet numerosiore prole adauctos, ab Arme-  
 niæ montibus, ubi arca hæserat, in diversos ter-  
 ræ cardines secessisse, & per orbis vastitatem  
 gentes propagasse. Ad nostram etiam insulam,  
 disseminatis paulatim familiis, ex eorum posteris  
 quosdam pervenisse cum ipsa ratio, tum Theo-  
 philii Antiocheni autoritas comprobatur. Cum, in-  
 quit ille, *præcis temporibus pauci forent homines in Ara-  
 bia & Chaldaea, post linguarum divisionem aucti & mul-  
 tiplicati paulatim sunt. hinc quidam abierunt versus Orien-  
 tem, quidam concesserunt ad partes majoris continentis, alii  
 porro profecti sunt ad Septentrionem sedes quaesituri, nec  
 prius deserant terram ubique occupare, quam etiam ad  
 Britannias in Arctoïis climatibus accesserint.* Nec mi-  
 nus disertè hoc docet ipse Moses, cum scribat à  
 Iapheti posteris insulas gentium in regionibus  
 suis divisas fuisse. Insulae gentium Theologis vo-  
 cantur, quæ sunt remotissimæ, & Wolphgangus  
 Musculus non infimi ordinis Theologus existi-  
 mat gentes & familias, quæ à Iapheto profluxe-  
 runt, primum occupasse insulas Europæ, quales

sunt, inquit ille, Anglia, Sicilia, &c. Iapheto au-  
 tem huic & ejus proli Europam cessisse præter  
 Theologos, etiam Iosephus aliique meminerunt.

Isidorus enim ex antiquo scriptore, *Gentes de stir-  
 pe Iaphet, quæ à Tauro monte ad aquilonem mediam par-  
 tem Asiæ, & omnem Europam usque ad Oceanum Britan-  
 nicum possident, nomina & locis, & gentibus relinquentes,  
 de quibus postea immutata sunt plurima, cetera perman-  
 ent ut fuerunt.* In Europæis etiam illam Noe be-  
 nedictionem, *Dilatet Deus Iaphet, & habitet in ta-  
 bernaculis Sem, sitque Chanaan servus ejus,* adimple-  
 tam vidimus. Europa enim victoris omnium gen-  
 tium populi, ut inquit Plinius, altrix, de reliquis  
 orbis partibus, quæ Semo & Chamo obtigerunt,  
 non semel triumphavit, & Iapheti prolapia in  
 hac parte longe lateque se diffudit. Ejus etenim  
 filii *Magog* Massagetæ, *Iavan* Iones, *Thubal* Hispa-  
 nos, *Mesech* Moschos procreavit. *Gomerus* vero  
 filius natu maximus *Gomeris*, qui postea *Cimbri* &  
*Cimerii* dicti, in his ultimis Europæ finibus & ori-  
 ginem dedit, & nomen imposuit. *Cimbrorum* enim  
 five *Cimeriorum* nomen hanc orbis partem quo-  
 dammodo opplevit, nec solum in Germania, sed  
 etiam in Gallia latissime paruit. Qui nunc sunt  
 Galli, ut habet Iosephus, & Zonaras, *Gomari*, *Go-  
 meræi*, & *Gomeritæ* à *Gomero* vocabantur. Ab his Gal-  
 liæ *Gomaris*, five *Gomeris* Britannos nostros ori-  
 ginem deduxisse, & nomen in originis argumen-  
 tum detulisse semper existimavi; ipsumque prop-  
 rium, & peculiare Britannorum nomen idem  
 persuasit. Ipse enim se *Kumero*, *Cymro*, & *Kumeri*,  
 mulierem Britannicam *Kumeræes*, & linguam *Ku-  
 meraeg* appellitant. Nec alia agnoscunt illi nomi-  
 na, licet ex his scioli quidam *Cambros*, & *Cambriam*  
 superiori seculo procuderint. Immo Grammati-  
 cus ille quem in suis *Catalectis* Virgil. perstringit  
 & Thucididem Britannum vocat, *Quintilianus*  
*Cimbrum* fuisse dicit. Et unde quæso hæc nomi-  
 na profluxisse existimemus, quam à *Gomero* illo,  
 & *Gomeris* in proxima Gallia? quæ priscorum *Go-  
 merorum* sedes. Germanos ab *Aschenaz*, Turcas  
 à *Togorma* *Gomeri* filiis prognatos credunt  
 eruditi, quod hi *Togormath*, illi *Aschenas* hodie Iu-  
 dæis vocentur. *Thracæ*, *Iones*, *Riphaos*, *Moschos*, &c. à  
*Thirax*, *Iavan*, *Riphat*, & *Moschi* oriundos ne-  
 mo inficiatur, propterea quod nomina non di-  
 screpent: *Ethiops* item à *Chus*, *Ægyptios* à *Misraim*  
*Chami* filiis profeminatos fuisse, quod iisdem no-  
 minibus, sua ipsorum lingua dicantur, nemo non  
 fatetur. Cur ergo non fateamur Britannos, five  
*Cumeros* nostros ipsissimos esse *Gomeri* poste-  
 ros, & à *Gomero* nominatos? Nomen enim op-  
 time consonat, & in confesso est illos extremos  
 Europæ fines infedisse. Quod etiam ipsum *Go-  
 meri* nomen non temere, sed divinitus datum in-  
 nuit. *Gomer* etenim lingua sancta *Finiens* interpre-  
 tatur. Nec quis detrahendi studio nostris *Cume-  
 ris*, five *Cimbris* objiciat quod *Cimbros* lingua  
 Gallica latrones dici *Sextus Pompejus* scripserit.  
 Licet enim *Cimbri*, inter quos, etiam nostros  
*Cumeros* fuisse probabile est, in illa *Ἰουμαῖ* mundi  
 ætate, qua fortitudo bellica excelluit, ab his Eu-  
 ropæ finibus errabundi, ut author est *Possidonius*,  
 ad Paludem usque *Mœotidem* latrocinando  
 militiam agitarint: non tamen *Cimber*, magis  
 latronem significat, quam *Ægyptius* superstitio-  
 sum,

Orig. lib. 9.  
cap. 2.

Genes. 9.

Gomeri, Ci-  
merii, Cu-  
meri, &c.

Lib. 3. c. 3.

Phil. Me-  
lanit.